



*Komunikadu Imprensa*  
*11 Setembru 2013*

## **Tribunál Distitál Dili suspende pena prizaun fulan 4 ba tinan 1 fulan 6**

Iha 6 Setembru 2013, Tribunál Distritál Dili le'e leitura sentensa ba kazu violénsia doméstika ne'ebé komete husi arguidu RFSV hasoru nia kónjuje MG, iha Distritu Dili.

Ministériu Públiku akuza katak, iha 5 Jullu 2010, arguidu basa dala ida iha lezada nia hasan parte karuk, tuku dala ida iha matan fukun parte loos. Aktu ne'e rezulta lezada monu ba rai no lezada ninia kabun baku ba kadeira sofa no kauza moras iha kabun kidun.

Depoisde monu tiha arguidu kontinua foti ai-kabelak atu baku, maibé lezada nia tiu mak satan netik tiha no hadau tiha ai-kabelak ne'e. Kazu ne'e akontese tanba lezada husu xave motor iha arguidu atu ba loja, maibé arguidu la fó tanba lezada grávida hela no lezada sisi (ezije) nafatin.

“JSMP observa katak violénsia doméstika kontinua aumenta husi loron ba loron, tanba ne'e JSMP konvida ema hotu atu halo esforsu hotu ne'ebé posivel tuir ida-idak nia knaar atu reduz no prevene violénsia doméstika no asegura kondendasaun ne'ebé apropiadu ba arguidu sira,” dehan Diretór Ezekutivu JSMP, Luis de Oliveira Sampaio.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 alinea (d) no artigu 35 Lei Kontra Violénsia Doméstika.

Iha audensia arguidu hili direítu nono'ok tuir artigu 60 Kódigu Prosesu Penál. Iha parte seluk lezada deklara katak, arguidu basa no tuku dala ida iha nia matan fukun parte karuk.

Iha alegasaun Ministériu Públiku husu ba tribunál atu suspende pena no husi parte defeza husu ba tribunál fo pena ne'ebe justu.

Depois avalia faktus sira ne'e hotu, tribunál konklui hodi fó pena prizaun fulan 4 suspende ba tinan 1 fulan 6.

Kazu ne'e rejista iha tribunál ho Númeru Prosesu: 211/2013/TDD. Dra. Jacinta Correia da Costa mak prezide julgamentu ne'e, Ministériu Públiku representa husi Dr. Jose Elu no arguidu hetan defeza husi Dr. Jonas Henrique husi Defensória Pública Estajiáriu.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl